

Perwanit minta silat diluas ke sekolah

12 OCT 1991

Oleh SAINI SALLEH

PERSATUAN Wanita dan Teruna (Perwanit) akan meminta Kementerian Pelajaran supaya menimbangkan kemungkinan meluaskan seni silat di sekolah-sekolah sebagai kegiatan luar darjah tambahan.

Saranan tersebut merupakan antara beberapa perkara utama yang dijangka menjadi pokok perbincangan dalam seminar silat selama sehari dan kali pertama dianjurkan oleh persatuan itu pada 27 Oktober ini.

Setiausaha Agung Perwanit, Encik Johari H.M. Uriff, berkata: "Jika resolusi membolehkan meluaskan silat di sekolah-sekolah diluluskan dalam seminar tersebut, kami akan segera mengirimi memorandum kepada Kementerian Pelajaran.

"Rancangan ini bukan saja akan dapat dijadikan kegiatan luar darjah tambahan tetapi dalam masa yang sama dapat mempopularkan si-

lat di kalangan pelajar semua kaum di sini."

Seminar sehari pada 27 Oktober di Balai Rakyat Siglap itu akan dirasmikan oleh Menteri Negara (Pelajaran), Haji Sidek Saniff dan ditutup oleh Anggota Parlimen bagi Kawasanundi Perwakilan Kumpulan (GRC) Bedok, Encik Abdullah Tarmugi.

Menurut Encik Johari, sebanyak tiga kertas kerja akan dibentangkan dalam seminar tersebut — dua dari Perwanit dan satu lagi dari perwakilan Jogjakarta.

Pada malamnya, satu siri demonstrasi silat termasuk corak terbaru akan dipersembahkan kepada para peserta seminar yang dijangka seramai 200 orang termasuk 10 dari Indonesia.

Turut dipersembahkan ialah demonstrasi silat dari kumpulan-kumpulan perguruan Tapak Suci Putera Muhammadiyah dari Seni Bela Diri Indonesia, Tapak Suci Perwanit dan Seligi Tunggal Perwanit.

Mengenai tujuan seminar yang kali pertama dianjurkan oleh Perwanit itu, Encik Johari berkata, antara lain ia bertujuan untuk meninjau perkembangan silat bagi tahun-tahun 2000.

Dalam hal tersebut, selain mengembangkannya di sekolah, Perwanit juga akan membentangkan rancangan menjalankan kajian mengenai tren minat belia Melayu terhadap silat.

Turut dibentangkan ialah rancangan mengubahsuai sistem anugerah latihan silat untuk memudahkan pelatih mendapat tauliah.

Ini termasuk membahagikan latihan kepada tiga peringkat — permulaan selama tiga bulan, pertengahan (tiga bulan) dan atasan (enam bulan).

Ini bermakna pelatih lebih mudah mendapat anugerah dalam setahun dan boleh selesai mengikuti kesemua peringkat tersebut, tambahnya.